

Ni Yensa Afoolenne Ñanraagofon Wuulen Amákilan

Ayikyik bísiba, Yensa ingi ñantaalibehinem anjuc jakanku Galile. Bampúti a gúbido gonon, Yensa ingi ñantaalibehinem annooh a réenjo k'anyohála hotir. Kanda bannoohi, jamaño jup andékirne ki ki Yensa ajébineenin. Angu Yensa ajébunjebun jaman ñanlabahi. Afak akawandiyeenin Gúloku Díino.

Bísibaño bañuuni, kúugo alah jamaño. Agida, yahálaarañan biriman tápáro. A kanañanjo gangune. Yikiren bitikenjo, yikiren hádigeno, angu jafoola giren na. Kanda Yensa, bafégi ni kúugo alahne jamaño, ayik bankaban dáde. Asíibáásiib k'afooleneenin.

Angu, Yensa ayéj utaalibehinem
m'aretuhne Filip...

- Angu inini, mintor, beeran
gíndokhoṅne ba gugilakánin
úmbuuro k'ankáb?

⁶ Agida Yensa apápájul
n'akaanorunkánehe, man burifhu
Filip ganane k'apájul k'agune. Filip
anoyindem ayéj:

⁷ - Mintoron, immi tu haani wuuliyen
nintigen ginlahoṅne dinlitineeniṅ ki
monon monon apiren ayik hotigilir.

(San 6:5b-7)

Úfegen, a didiirahu Israyel, gufoolahánin
ingine úmbuuro. Bim úmbuuro seden. Imbi,
jafoolano ja sedene ingine bapaasero

mbaŋ dítiro. A bukokint, jafoolaŋo ja
sedeŋne ingine pompáteero mara
pompáteero alabalaba bim. Kanda a bukoku
Yensa, Israyel, jafoolaŋo ja sedeŋne ingine
úmbuuro, mara úmbuuro alabalaba bim.

Angu, Yensa ayéj Filip, «Beeran
gíndokhoŋne ba gugilakánin úmbuuro
k'ankáb» Filip awaala ayéjem, «Mintoron,
immi tu haani wuuliyen nintigen ginlahoŋne
dinlitineeniŋ ki moŋon moŋon apiren ayik
hotigilir.» Nim Filip ayéjne. Úpájulen,
timaŋo anrumunrumun dáde. Barumunku
jamaŋo m'andékirne imbi Yensa afaŋi
ñanraagofon wuulen amákilaŋ.

Kara ulentahenlenta waathu ránkubo?
Lentaaren bísibaŋo bi jibotoŋo anŋanne a
bujofo. Bísibaŋo bímár timaŋo

anrumunrumun Ñaamol. Ñandékaño jup!
Dam, bútibilahu jafoolaño ki moñon moñon
ayaahála ahay aléleer dáde ni jamaño
anrumunne.

Inini, jamaño m'andékirne imbi Yensa a
kanañaño afañi jamaño m'andékne Ñaamol
a waathu ránkubo. Angu Yensa, neerañ
gapirenkinehne afooleneeniñ fo moñon
moñon ayaahála ahay? Gúmár akanne Filip
ayéj, «Haani wuuliyen nintigen ginlahoñe
dinlitineeniñ ki moñon moñon apiren ayik
hotigilir.» Agida immeren yikireñen.

Jantenten Gúloku Díino:

⁸ Angu utaalibe úduk, m'aretuhne
Andáre afak alób. Agida úmár
údonku Simon Piyer:

⁹ - Ingah! Ayikyik nanka hambaani
úduk m'alah ñómbuur ñómekila ingi
ñokat ñonak. Kanda n'angu jamaño
anrumunne dáde dalit.

(Sanj 6:8-9a)

Marigeno dalit! Jamaño m'angune na dam,
ñanraagofonjo wuulenjo amákilajo. Afañi
jamaño m'andékne Ñaamol a waathu
ránkubo. Hóge ñómbuur ñómekila ingi
ñokat ñonak apirenkineh ahayun jamaño
nip? Wówo, dapiren! Kanda haman nim,
wolo m'alahne ñómbuuro ñómákilajo ingi
ñokato ñonako, adék anéer Yensa
jafoolahánam.

Jantentej Gúloku Díino:

Angu wolo adooh jafoolajo
j'adoorne k'adék anéer Yensa. ¹⁰ Fo

Yensa ajahne jafoolaŋo jámár, ayéj
ñantaalibehinem:

- Inini, yéjereeniŋ annooh.

K'angu andak ankaan maŋ nim.
Agida japoño awalwal hotir k'asúum
kunooŋo a réeŋo. Angu annooh
anrumun tip. Índiigeeno ba bareŋ
m'anoone ambábár agofonj wuuliyen
amákilaŋ. Agida indikaamo ingi
jaraaho tébiira. ¹¹ Angu jamaŋo
bannoohi, Yensa adooh úmbuuro.
Badoohi úmbuuro, k'asali aramun
Díino a gúbidhu jafoolaŋo. Baramuni
Díino mees, adooh úmbuuro anéer
jamaŋo k'ankibay. Bankibay mees,
Yensa afak aramun Díino a gúbidhu

ñokato. Bankibay tu, moŋon moŋon
adooh k'afoola ahay.

¹² Jamaŋo banhay, Yensa ayéj
ñantaalibeŋo:

- Inini údekhineŋ úduk ujaháran
ñofallaheeno ki biki
impuñpuñinoonun.

¹³ Bayéji nim, andék anjah, f'andék
ambádur hatáhel haala ingi hanak
hofallahenku ñómbuuro ñómákilaŋo
ñ'aginumaane orugo. (Saŋ 6:9b-13)

Angu, fo Yensa afacne úmbuuro k'anéer
jamaŋo ki jamaŋo ankibay, Yensa akankaan
ki úmbuuro détireŋ. Ankibay, ankibay,
ankibay, fo baman jamaŋo nip anyaahála
anhay. Ñokato ñonako mees, fo Yensa
apoculne ñokato k'anéer jamaŋo ki jamaŋo

ankibay, Yensa akankaan ki jakato détiŋ.
Ankibay, ankibay, ankibay, fo baman
jamaŋo nip anfoola úmbuuro ingi jakato.
Anfoola fo anhay, f'adék ayik
bifallahinkinem jup.

Dam, Yensa afak akaan honj ho Díino bareŋ
apiŋenne akaan. Afoolenfoolen jamaŋo jup,
ñanraagofonj wuulenj amákilaŋ.
Afooleneeniŋfoolen fo anhay ingi ñómbuur
ñómekila ingi ñokat ñonak bareŋ.

Afúrumi na, bísibaŋo bañuuni, Yensa ingi
ñantaalibehinem anfak anjuc jakaamo
k'ampút a bukooro b'aretuhne Kapáneyum.
Gucunkunom, jamaŋo mi Yensa afoolenne,
immerenj mees ampúturne Kapáneyum
k'andék antíb Yensa. Kanda Yensa
f'afégeeniŋne, ayéjeeniŋ:

- Ninkinan! Janteneŋ baŋ
k'íteekinoonuŋ marigeno. Ninkinan
ŋayroŋ bukokulinkum a gubaarhu
n'uwuteŋne *tamaasereŋo n'ekanne.
Bukokulinkum guŋayeŋne a
gubaarhu ni búyekinan anhayne!

²⁷ Inini, ninkinan ii, dahu úduk
ukaanaŋ jamméejenkánan nip a
dohohu jafoolaŋo j'adékehne
bupuña. Kanda ninkinan, majaareŋ
k'utibilahaŋ jafoola j'ópájulne
dapuñahar. Jafoolaŋo jámár, jámár
agune j'anéerumehne kanjébo ka
bandór. Me Údiigeeno
M'acaabenaane ipiren íneeroonuŋ
jafoolaŋo jámár. Ipiren íneeroonuŋ
jámár maro Bááhum anéereemne
sembego nómar. Ninkinan,

fiyimeemun maro Díino Bááho
ajellihinoonunjellihin maro íbábár
gufiyum. (Saṇ 6:26-27)

Eke ayikyik kúugo a gúbidhu jafoolaṇo?
Marigeno, ayikyik. Kanda afak ayik kúugo a
gúbidhu Díino. Horaṇ ingine kúugo a
gúbidhu jafoolaṇo? Hómár ingine, búyeero
gamusomus k'ahoonoh k'uhaami guyaahála
dáde, ininkaman a waathu sumo. Aji
yaahálaaro ásibaṇ, damiñ k'uniiro. Gúmár
ingine kúugo a gúbidhu jafoolaṇo.

Angu gíyeji ayikyik kúugo a gúbidhu Díino,
na nuko neeraṇ gísiibane búyejo? Hómár
ingine, maṇ ni úsiibane jafoolaṇo waato no
kúugo alahenne, maṇ nim gúsiibahánehe
búpájihu Díino. Úsiibahánehe dáde k'úpájul
Díino n'amíirne. Úsiibahánehe k'úpájul mara

Díino abonkerbonker jínubonkon.

Úsiibaháneh k'úpájuloora mara Díino inno na a binankan. Hómár ingine kúugo a gúbidhu Díino.

Inini, horaŋ afaŋumne n'ayik nafa? Ki kúugo amuk a gúbidhu jafoolaŋo, mbaŋ ki kúugo amuk a gúbidhu Díino? Ki kúugo amuk a gúbidhu Díino, mara haani ihay gucum gucum ingi jafoolaŋo, ayikhineh bísiba, iniirohune. Angu, bísibaŋo bímár, jafoolaŋo danafaham. Haani a duniyaŋo inno jafoolaŋo dapiren k'ahayun jamméejhum.

Kanda aji kúugo k'alaheemne a gúbidhu Díino, aji kúugo kúmár amuki, aji ípájuli Díino, aji ípájuli mara Díino abonkerbonker jínubonkum nip, hómár anafaháneh dáde

mara giniroy, ídekhineh arijanna k'iguy
bandór imbi Díino arijanna. Faka, aji ípájuli
Díino, iyikhineh básuumo b'afúruntné imbi
Díino. Hafithum anoohunkuneh, ilaahum
awaanaháneh. Hómár anafanafa dáde!

Kanda hóge ayikyik jafoola j'apirenkinehne
akaan ki kúugo k'alaheemne a gúbidhu
Díino amuk? Hóge ayikyik úmbuur
n'épirenkinehne íkáb ki kúugo k'alaheemne
a gúbidhu Díino amuk?

Angu, gúlob gúsuumi ingine, marigeno
ayikyik! Yensa ayéji:

²⁷ Inini, ninkinan ii, dahu úduk
ukaanə jamméejenkánan nip a
dohohu jafoolaŋo j'adékehne
bupuña. Kanda ninkinan, majaaren
k'utibilahanə jafoola j'ópájulne

dapuñahar. Jafoolaño jámár, jámár
agune j'anéerumehne kanjébo ka
bandór. Me Údiigeeno
M'acaabenaane ipiren íneeroonuṅ
jafoolaño jámár. Ipiren íneeroonuṅ
jámár maro Bááhum anéereemne
sembeṅo nómar. Ninkinan,
fiyimeemuṅ maro Díino Bááho
ajellihinoonuṅjellihin maro íbábár
gufiyum.

²⁸ F'alóbne nim, anyéjem:

- Mint ii ísiibáámiṅsiib bukanku
dohoṅo no Díino asíibane. Inini,
ikaanmiṅ neeraṅ?

²⁹ Bammiihem nim Yensa
aṅoyindeeniṅ ayéjeeniṅ:

- Úpájulen, Díino dohoŋo n'asíbane
k'ukaanaŋ, nómár agune
k'ufiyumeemuŋ, me Úbárám mu
ámár abúuñurne. (Saŋ 6:27-29)

Angu, Yensa ayéjyej jamaŋo mara apiren
anéereeniŋ jafoolaŋo j'apirenkinehne akaan
ki kúugo k'alaheeniŋne a gúbidhu Díino
amuk. Kanda jamaŋo anlahlah mara
añantay andoho dáde ki Díino anéereeniŋ
jafoolaŋo jámár.

Uñantay udoho dáde k'uyik jafoolaŋo, eke
nim e? Úlááfihineh, usuulhuneh,
ufacháneh, uhunkuneh fo úgiif maf. Angu
jamaŋo anláh mara imbi Díino mees,
uñantay udoho dáde k'asúum Díino. Fo
udoho dáde! Fo ukaan hójooninno jup
k'upiren údek arijanna! Jamaŋ ñanlabahi,

nim ganlahne baman bísibaŋo bi gub. Nim jamaŋo m'andékirne imbi Yensa anlahne. Gúmár akanne anyéjem, «Mint ii ísiibáámiŋsiib bukanku dohoŋo no Díino asíibane. Inini, ikaanmiŋ neeraŋ?» Kanda Yensa horaŋ gayéjne? Awaala ayéjeeniŋ, «Úpájuleŋ, Díino dohoŋo n'asíibane k'ukaanaŋ, nómár agune k'ufiyumeemuŋ, me Úbárám mu ámár abúuñurne.»

Lentaarenŋ jamanku Israyel f'angune a kanaŋaŋo kalaalinno. Fo basumoolo anŋane búkábhánin, horaŋ ganñantane ankaan ki Díino apahuneeniŋ ki daha anniiro? Hoge anñantay andoho k'ankaan hójooninno jup ki Díino apahuneeniŋ? Wówo, anñantay anfiyum Díino k'anning a busumoolo bu Musa ahájne a gulihano.

Fo kúugo alahne jamanku Israyel fam a kanaanjo kalaalinno, hóge anñantañanta andoho dáde k'anyik jafoolaño? Wówo, Díino anéereeniñneer jafoolaño. Díino anéereeniñne úmbuuro n'afúruntné arjanna n'aretuhne manaho. Immeren anñantay anfiyum Díino bareñ, k'andooh úmbuuro no Díino anéereeniñne k'ankáb.

Angu Yensa f'alóbine ingi jamaño ayéjeeniñ mara kúugo k'alaheeniñne a gúbidhu Díino amukhuneh aji anfiyumi úmár Yensa. Aji anfiyumi Yensa bareñ, kúugo k'alaheeniñne a gúbidhu Díino amukhuneh.

Jantenteñ Gúloku Díino:

³⁰⁻³¹ Yensa balóbi nim jamaño an fak anyéjem:

- Inini, kandut mint *tamaaser
n'ópájulne mint ipirenkinemiŋ
ídommiŋ gúlokon k'ifiyumomiŋ! Maro
eke maamaamankintor fam
f'anguyerne a kanaanjo ingi Musa,
ganyaahayaah jafoolajo j'aretuhne
manaho? Eke nim ganñaañne a
Hañaañeno? Anñaañaañ na anyéj:
«Anaheeniŋnah úmbuuro
n'afúruntné arjanna k'ankáb.»?
Angu, fi neeraŋ gúdekehne
bukankint?

³² Banlóbi, Yensa ayéjeeniŋ:

- Ninkinan! Janteneŋ baŋ
k'íteekinoonuŋ marigeno. Karo
ulahenlah karo Musa
anéeroonuŋneer úmbuuro nómár?

Wówo! Musa nédoonun ́úmbuuro
nómár n'afúruntné arjanna. Ingah!
Bááhum anéeroonunne ́úmbuuro
nómár. Kanda inini, gúsiibahan,
Díino apiren anéeroonun ́úmbuuro
no marigeno. ́Úmbuuro no marigeno
nómár agune ́úmbuuro n'afúruntné
arjanna. ³³ ́Úmbuuro nómár, nómár
agune horaṅ? Nómár agune wúuro
m'afúruntné arjanna k'anéerumeh
kanjébo a duniyaṅo.

³⁴ Yensa, balóbi nim, anyéjem:

- Angu ́úmbuuro nómár n'úlobne,
nahar nómár mint, gucum gucum!

³⁵ Yensa aṅoyindeeniṅ ayéjeeniṅ:

- Me faṅo, me igune ́úmbuuro nómár
n'anéerumehne kanjébo.

Ugurumaarenj adékirne aguy ingi me
k'afiyumeem, kúug ingi baaru
dalahaharam. (Sanj 6:30-35)

Angu Yensa ayéjyej jamaño mara iniman ni
Díino anahne jamanku Israyel famo
úmbuuro n'afúruntné arjanna k'ankáb ki
k'ahayuneeniñ ki daha anniiro a kanaanjo.
Mañ nim, a waato inno, Díino anahne
jamanku duniyaño nip úmbuuro
n'afúruntné arjanna. Aji ankábi úmbuuro
nómár, kúugo n'alaherne jamaño a gúbidhu
Díino amukhuneh. Horañ ingine úmbuuro
nómár? Úmbuuro nómár ingine **Yensa**.
Gúmár akanne Yensa ayéji, «Me faño, me
igune úmbuuro nómár n'anéerumehne
kanjébo. Ugurumaarenj adékirne aguy ingi
me k'afiyumeem, kúug ingi baaru
dalahaharam.»

Ayikyik kúugo a gúbidhu jafoolaŋo. Ayikyik kúugo a gúbidhu Díino. Hómár ingine, uhaamihaami Díino. Uhaamihaami búpájihu Díino n'ayabenne. Uhaamihaami ki bájegenenku fi ingi Díino ajóoninaa. Úsiibáásiib k'úpájul mara Díino abonkerbonker jínubonkon. Hómár ingine kúugo a gúbidhu Díino. Angu Yensa ayéji mara maŋ ni Díino abúuñurne úmbuuro a kanaŋaŋo fam ki kúugo a gúbidhu jafoolaŋo amuk, maŋ nim Díino abúuñurne Yensa a duniyaŋo ki kúugo k'alahne jamaŋo a gúbidhu Díino amuk. Úfegen, Yensa ajóoninkineh bájegenenku Díino ingi jamaŋo. Yensa akankáneh honj ki Díino apiren abonker, ki Díino apiren akafari jínubonkintor nip baman dagurumaarenj. Yensa adékridek a duniyaŋo k'apahun

mintoron a jínubonkintor, k'ajóonin
bájegenenku mintor ingi Díino. Gúmár
akanne Yensa ayéji, «Me faño, me igune
úmbuuro nómár n'anéerumehne kanjébo.
Ugurumaaren adékirne aguy ingi me
k'afiyumeem, kúug ingi baaru
dalahaharam.»